

BESTELAKO XEDAPENAK

OSASUN SAILA

3276

AGINDUA, 2017ko maiatzaren 31koa, Osasuneko sailburuarena, Etxebarriko farmazia-eskualdean, Etxebarri Doneztebeko Elizatean, farmazia-bulego bat sortzeko prozedurari hasiera eman zaiola iragartzen duena.

Euskal Autonomia Erkidegoko Ordenazio Farmazeutikoari buruzko ekainaren 17ko 11/1994 Legearen 34.1 artikuluan ezartzen denez, farmazia-bulego berriak zabaltzeko deialdia edo, hala bada, deialdi hori bidezko ez dela aditzera ematen duen iragarpena urte bakoitzeko lehen seihilekoan egingo da, biztanleen udal-errola berrikustetik ateratako datuak izan ondoren.

Bada, datu ofizial horien azterketatik ondorioztatzen da Etxebarriko farmazia-eskualdean, Etxebarri Doneztebeko Elizatean, farmazia-bulego berri bat irekitzea bidezkoa dela.

Hori guztia kontuan hartuta, hau

EBAZTEN DUT:

1.– Deialdia egiten da Etxebarriko farmazia-eskualdean, Etxebarri Doneztebeko Elizatean, farmazia-bulego berri bat sortzeko, farmazia-bulegoak sortzea, lekuz aldatzea, ixtea eta jardunean jartzea arautzen duen ekainaren 27ko 338/1995 Dekretuan xedatutakoarekin bat (otsailaren 3ko 24/2004 Dekretuak aldatu zuen dekretu hori).

2.– 11/1994 Legearen 13. artikuluan xedatutako irizpideekin eta 2017ko biztanleriaren datuekin bat, Etxebarriko Udalerrian kokatu beharko da deialdiko farmazia-bulegoa.

3.– Hilabetekoa izango da deialdiko farmazia-bulegoaren titulartasuna lortzeko eskabideak aurkezteko epea, agindu hau Euskal herriko Agintaritzaren Aldizkarian argitaratu eta biharamunetik aurrera.

4.– Aipatu eskabideak ekainaren 27ko 338/1995 Dekretuaren 2. artikuluan aurreikusitako agiriak erantsita aurkeztu beharko dira, 24/2004 Dekretuak emandako idazkeran.

5.– Administrazio Publikoen Administrazio Prozedura Erkidearen urriaren 1eko 39/2015 Legearen 16.4 artikuluan ezarritakoez gain, eskabideak honako helbide hauetan aurkeztu ahalko dira:

Osasun Saila: Donostia kalea 1, 01010 Vitoria-Gasteiz.

Arabako Lurralde Ordezkaritza: Olagibel kalea 38, 01004 Vitoria-Gasteiz.

Gipuzkoako Lurralde Ordezkaritza: Antso Jakitunaren kalea 35, 20010 Donostia.

Bizkaiko Lurralde Ordezkaritza: Errekalde zumarkalea 39, 48008 Bilbao.

Vitoria-Gasteiz, 2017ko maiatzaren 31.

Osasuneko sailburua,
JON DARPÓN SIERRA.